

## 每週經課朗誦經文(巴克禮漢羅/教羅)2012/12/23

### 共同經課 - 1

#### 彌迦書五章二節～五 a 節

2 伯利恆 Í-hoat-tha ah, 你 tī 猶大 chiah-ê 鄉社中做微細 ê, beh 有一個對你 hia 出來, tī 以色列中間 kā 我做掌權 ê; 伊 ê 根源 tùi 古早, tùi 第一起頭就有。3 所以伊 beh 將 in 交 hō 對敵, 到生產 ê 婦人人生 kiáⁿ; hit 時伊所 chhun ê 兄弟 beh tò 來歸以色列。4 伊 beh khiā-teh, oá 靠耶和華 ê 權能, kap 伊 ê 上帝耶和華威嚴 ê 名, 來飼伊 ê 羊群; in beh 安然 khiā 起; 伊 beh 做大, 到地 ê 極頭。5 Chit-ê 人 beh 做咱 ê 平安。

### 共同經課 - 2

#### 路加福音一章四十六 b 節～五十五節

46 我 ê 心尊敬主做大, 47 我 ê 神因為救我 ê 上帝來歡喜。48 因為伊看顧女婢 ê 卑微; Tùi taⁿ 以後萬世代 beh 講我有福氣。49 因為 hit-ê 有權能 ê 為 tiòh 我做大 ê tāi-chì, 伊 ê 名是聖。50 敬畏伊 ê 人伊憐憫 in, 到代代。51 伊 bat 用伊 ê 手出氣力, 心志驕傲 ê 人伊有趕散 in。52 有權能 ê 人, 伊 lut in ê 位, 卑微 ê 人, 伊升 in 做高。53 Iau ê 人伊用好物 hō in 食到飽, 富 ê 人, 伊 hō in 空空 tò 去。54 伊扶助伊 ê 奴僕以色列, 來記念憐憫, 55(照伊對咱 ê 祖所講 ê 話), 來施落 hō 亞伯拉罕 kap 伊 ê 後裔到永世代。

### 共同經課 - 3

#### 希伯來書十章五節～十節

5 所以伊來入世間, 就講, 祭祀禮物你 m̄-ài, 你 bat kā 我備辦身軀; 6 燒祭 kap 贖罪祭, 你無歡喜; 7 Hit 時我講, 你看, 我來 lah, 我 ê 事記載 tī 冊裡, 上帝, 我來是 beh 行你 ê 旨意。8 頂面已經講, 祭祀 kap 禮物, 燒祭 kap 贖罪祭, 你 m̄-ài, 亦無歡喜, (chiah-ê 是照律法來獻 ê), 9 後來講, 你看, 我來是 beh 行你 ê 旨意。伊是除去事先 ê, beh 設立 tè 後 ê。10 Tī chit-ê 旨意, tùi 耶穌基督一 pái 獻身軀, 咱得 tiòh 成聖。

### 共同經課 - 4

#### 路加福音一章三十九節～四十五節

39 Tī chiah-ê 日 ê 中間馬利亞起身, 趕緊去山地, 到猶太一個城, 40 入撒迦利亞 ê 厝, 請安以利沙白。41 以利沙白一下聽見馬利亞請安, 胎孕 tī 腹肚內就 tiò 跳。以利沙白 hō 聖神充滿, 42 就大聲講, 眾婦人 ê 中間你得 tiòh 福氣, 你所懷孕 ê 也得 tiòh 福氣。43 我 ê 主 ê 老母來就近我, 我 tùi tá-lòh 能得 tiòh án-ni ah? 44 因為你請安 ê 聲一下入我 ê 耳孔, tī 我腹肚內 ê 胎就歡喜來 tiò 跳。45 信 ê 婦人人有福氣 ah, 因為主所 kā 伊講 ê 話 beh 應驗。